

in 40, et che tutto sta in ordine in Constantinopoli, et cussi ancor l'armata sua et anche tutte sue zente che l' à mandato a far sì a piedi come a cavallo et pedoni numero 20 milia; ma non se intende se questi pedoni venirano per terra over con l'armata. De qui el leva più zente el puol de li soi soldati, et ogni zorno questo signor Cayrbech li mandano per zornate per Damasco, et tutti a presentarse a la Porta dal Signor turco. Ma assai di queste fuzeno et vanno in altra parte per non voler andar dal Signor turco, per esser maltratate dil suo soldo, si janizari come spachi. Fino a pochi zorni se intenderà quello vol far el Signor turco, zoè levarse di Damasco over non, et si saperà *maxime* per quelli hanno portato la testa dil suo nepote al Signor turco a Damasco a presentarla. Per il suo ritorno se intenderà el tutto certo per el mio amico, et del tutto aviserò vostra magnificenza.

A di 27 ditto. È venuto nova come Benezazar, ch'è uno gran capo de arabi de questo paexe, averse rebelato al Signor turco, et à mandato sue zente a la strada, et alcuni turcomani che vegniva da li casali et portava danaro al Cayro che avevano scosso da la villa de le intrade dil Signor turco, e portava el tutto a Cayrbech, li fo tolti, et li portatori fuziti à portà questa nova. Questo signor Chayrbech mandò zente contra loro; non potè far nulla et ritornò come bestie. Turcomani stanno di qui molto di mala voglia per esser maltratati del suo soldo; poi stanno con grande paura, e dize: « Nui saremo tra l'ancuzene e lo martello, non sappiamo a cui servir ».

A di ultimo Fevrer. Ho inteso el Signor far vista de trar zente di questo loco del Cayro, et monstrar voler andar contra la bareta rossa, e dize esser la volontà sua de passar in Cypro, et ha serito a Constantinopoli et a Salonico che tutta la sua armata se deba levar et vegnir a queste marine de la Soria, zoè in golfo de la Giaza, Tripoli e Baruto, e più presto i poleno fino a mezo el mexe di Marzo. Se dize ancora, per dar color a la cossa, che el Signor turco ha mandato a far ponte sopra el fiume ditto Eufratam, ch'è lontan d'Aleppo zornate tre e più. Non si pol intender cosa certa; ma per zornata ocereo queste voxe. Ancor vien ditto la bareta rossa aver fato paxe con el Signor turco, et ha mandato suo ambador al Signor turco a Damasco, et el Signor turco averlo vestito et mandato via con grandi presenti. E aver fatto questo el Signor turco per dare a intender a Franchi de la bona paxe con la bareta rossa; *tamen* altri omeni da conto dicono certo la bareta rossa vegnir con el suo campo molto grosso a la volta de

Bagadet, et che la bareta rossa ha lassato persone 50 milia in Tauris in la sua guardia. Presto se intenderà dove questo Signor turco vorà dar la bota: non si puol far mal a star a l'erta e provisto, perchè questo è uno can che non tien alcuna fede, come pubblicamente si vede. Son stato in caxa di alcuni armiragi, domandato da loro, mei amizi, e di uno mio amico che se chiama Alagusmar, nostro franco, di nazione poco lontana di Venetia. Diti armiragii dizen: « Che fa cristiani, che non fanno cavalcar el re de Ungaria, *maxime* adesso che el Signor turco se atrova a queste parte con tutto il fior de le sue zente? » E dizen ancor altre raxon; che el Signor turco ha mandato a trazer dil suo paexe più zente el puol a piedi et a cavallo, e che 'l suo paexe sarà vuodo di zente da combater, nè potrà star a le frontiere dil re di Hongaria a quelle bande. Ancor dizen: « Che li signori cristiani non mandano armata e zente, che adesso è il tempo? » et che questo Signor turco manaza molto el Monestier e Cypro, et che finalmente questo Signor turco poterà passar in Cypro et al Monastier se la bareta rossa non li dà impazo; et che quando el fosse signor de questi doi lechi, mai più cristiani non glieli cavarìa di le man, et saria signor de tutto el Levante. E disseno altre bone raxon, che se cristiani fosseno uniti cazeriano el Signor turco dal suo paexe, *maxime* che li doi terzi del suo paexe sono cristiani, zoè greci, albanesi, schiavoni, bosignachi et zucani, et poi ancor altri cristiani di la cintura dil suo paexe, et che tutti questi se vedeno tuorse ogni 4 anni li soi propri fioli de caxa sua, et li fa turchi. Et diseno ancor altre assai raxon, et *maxime* da questa parte (da loro) che sempre se averia aiuto et favor. Et poi dize la sua zente esser sazia dil Signor turco et servono mal volentiera el suo Signor per esser maltratadi da lui, et ogni zorno ne scampano, et vanno da le barete rosse, che fazilmente gran parte di le zente dil Signor turco se voltariano contra de lui, et *maxime* li soi janizari che stanno mal contenti, et se lamentano esser anni 4 che non fanno altro che combater. Queste cosse me sono stà dite, è stà per homeni de reputazion et amizi de cristiani. Dizeno *etiam* li cori de buffalo che 'l mandò a tuor de qui, che fono 6000 et 4000 de bò, el Signor turco li mandò a tuor per adoperar e meter attorno il suo campo per sua defesa come reparo, et sono andati a Damasco. Ozi, a di primo Marzo, è venuto messo del Signor turco a questo signor de questo loco. Avisa esso Signor turco essersi levato da Damasco con tutto el suo campo, et va a la volta di Aleppo,